

lis Gnovis

■ **QUEENSLAND.** Il bosc al torne dai Kuku Yalanji

La proprietât e la gjestion dal bosc pluviâl tropical plui antic dal mont a tornin in man ai natifs dal popul Kuku Yalanji. La decision de Australie, sul cont dal «Daintree National Park», e jentre dal procès di riconciliazion inviât dal Stât oceanic. I Kuku Yalanji e aminstraran il parc di passe 160 mil etars cul jutori dal guvier dal Queensland. Il bosc al à 180 milions di agns, al à stât declarât Patrimoni de Umanità «Unesco» e al ten cont un patrimoni straordenari di biodiversità umane e naturâl, cun passe 3 mil cualitâts di plantis, 368 di uciei e 113 di retii.

■ **PUART.** «Diminuzion legre» tes scuelis

Il Circul «Liveness-Tiliment» dal Moviment pe «Diminuzion legre» al propon ancje chest an i siei progjets educatîfs tes scuelis dal Friûl concuardiês sot Vignesie (www.mdflivenzatagliamento.it/?p=650). A funzionaran dôs propuestis di educazion ambientâl. La prime e je ché dai «Orti scolastici e non solo», pe realizazion di orti sinergjics te scuelute «Rodari» di Puart e te scuele primarie «Manzoni» di Tei. I voluntaris a compagnaràn i fruts te aplicazion de «permaculture» (che si propon di curâ la tiere e lis personis intun stîl di condivison), imbastint «orti sinergjics», «orti a lasagna», «orti rialzati», «spiralî di erbe aromatiche» e percors sensoriaî. A lis classis tiercis des scuelis mezanis di Puart al è destinât il progjet «Che aria respiriamo? Adotta una centralina», cu l'instalazion di una centraline pal control de cualità dal aiar in ogni scuele. I voluntaris dal Circul a compagnaràn i canais te comprension de relazion fra lis azions cuotidianis e il stât di salût dal aiar. «Coop Alleanza 3.0» e prudele il progjet, organizant une racelte publiche di finanziaments, tes sôs buteghis.

■ **MILAN.** Lis feminis di Tina Modotti

Li dal «Mudec» di Milan, a son esponudis, fintremai ai 7 di Novembar, te mostre «Tina Modotti. Donne, Messico e libertât», uns cent fotografis in stampe originâl dai agns dal Setante, gjavadis dai negatîfs de artiste udinese (1896-1942). La storie venturose e tormentade de Modote e je proferide tun libri gnûf, «Le indiscrete», dulà che Elisabetta Rasy e conte la vite di cinc grandis fotografis dal Nûfcen: in plui di Tina Modotti, ancje Dorothea Lange, Lee Miller, Diane Arbus e Francesca Woodman.

■ **MANIÀ.** La braùre di jessi «Ecomuseu»

Lis iniziatis e lis mostris da lis «Zornadis cul Ecomuseu» 2021 a tirin a di lunc, insin ai 10 di Otubar, in ducj i borcs e tes vilis dal Friûl occidentâl là ch'a operin i 71 socis de clape di promozion sociâl «Lis Aganis». L'obietîf al è chel tornâ a scuvierzi il «valôr profont des memoriis, tignint cont un patrimoni che ognidun al à di curâ, cun braùre e cun passion». Il lunari complet de esposizion, des seradis, dai cors, dai lavoratoris, des spassizadis si pues burîlu fûr tal lûc internet dal «Ecomuseu Lis Aganis», a la direzion: www.ecomuseolisaganis.it.

Miercus 6	S. Brun	Domenie 10	S. Denêl
Joibe 7	La Madone dal Rosari	Lunis 11	S. Zuan XXIII pape
Vinars 8	S. Demetri martar	Martars 12	S. Serafin
Sabide 9	S. Dionis martar	Il timp	Aiar fret e plois.



Il soreli
Ai 6 al iève aes 7.12
e al va a mont aes 18.37.



La lune
Ai 13 Prin cuart.

Il proverbi
Misuriti se no tu vûs sei misurât.

Lis voris dal mès
Se tal ort o vès ancjemò plantis (carotis, cucinis, pomodoros), bagnait trop che al baste e lassait che i prodots a madurissin.

Artisans sostenibii

E partìs la XII edizion de rassegne «TerraÈ» di Pordenon

«**J**o o salvi, tu tu salvìs, jè e je salvade, nô o salvìn, voaltris o salvais, lôr a salvìn: vòs dal verp futûr»: al scherze cu la gramatiche il titul di chest an de rassegne pordenonese «TerraÈ», ch'è torne dai 6 ai 27 di Otubar. Intant de diesime seconde edizion de rassegne, l'invit pal rinovament al sarà concentrât su la cuistion dai «confins gnûfs da lis energjiiis rinovabilis e de sostenibilitât». La clape di citadins di Pordenon, nassude dal 2010 cul istès non dal festival «TerraÈ» pe promozion di compuartaments cuotidianis sostenibils, e à sielzût d'inmanea un apontament par setemane, ogni miercus di sere. Par salvâ il Marimont, seont chei di «TerraÈ», al bastarès cjapâ cussience dal valôr des sîs peraulis ch'a saran distaponadis vie pes ativitâts de rassegne, al ven a stâi: «imparâ, ralentâ, impegnâsi, mudâ, sparagnâ e recuperâ». L'uniche iniziative «fisiche» e je stabilide par domenie ai 10 di Otubar, cuant ch'è sarâ



Debora Sbaiz davanti de fornâs di Flambruç dulà ch'è implantât l'«Ecovillaggio Gaia Terra» (dal lûc internet www.terranuova.it/News/ECOVILLAGGI-E-COHOUSING/FRIULI-ECOVILLAGGIO-GAIA-TERRA-INIZIA-L-AVVENTURA)

Sîs azions par salvâ la Tiere: «imparâ, ralentâ, impegnâsi, mudâ, sparagnâ e recuperâ»

proponude une visite guidade li dal «Ecovillaggio Gaia Terra» di Flambruç di Rivignan (a 15), ch'è sarâ sierade cu la proiezion dal docufilm «Alla ricerca di un senso» (a 18). Il sproc ch'al compagnarà la zornade al è: «Nô o ralentîn, molant la furie des nestrîs abitudins... la Tiere e je salve».

I apontaments «on line» a tacaran cun chel su la responsabilitât e su la cussience ambientâl («Jo o impari dai miei fâi... jè e je salve»), ch'al cole ai 6 di Otubar. Debora Fabietti e proponarà une leture dal so libri, ispirât di Dante Alighieri, «La Gallina Commedia». Te matnade de joibe, l'iniziativa e sarâ replicade pai fruts des scuelis. Enrico Mariutti, president dal istitût «IsAG» pai studis di Gjeopolitiche e di Sciencis ausiliârs, al sarâ protagonist de convigne dai 13 di Otubar su «La legre decarbonizazion», mostrand che se «Nô o mudin strategie... jè e je salve».

L'apontament dai 20 di Otubar al frontarà la cuistion dai sparagns necessaris par salvâ il Marimont. In grazie di Fabrizio Urru, inzegnâr di «Ape», si resonarà sun

ce che si pues fâ ognidun cjase sô. Il titul de convigne al sarâ: «Incentivi e 110% - Quali novità». «TerraÈ» 2021 e finissarà ai 27 di Otubar, cuntun intervent di Grazia Cacciola su «L'Autoproduzion e je la rivoluzion vere», par ribati che, se «Nô o recuperin ideis e risorsis... la Tiere e je salve».

Dutis lis convignis «on line» a tacaran a 20.30, sui cjanâi «YouTube» e «Facebook» de clape pordenonese, coordinadis di Giorgio Simonetti e di Silvia Zamai.

Mario Zili

Societât Filologjiche Furlane, cors pratics

A tornin a partî i «Cors pratics di lenghe furlane», par cure de «Societât Filologjiche». Ai 8 di Otubar, li de sede di strade Manin, si scree chel par Udin. Ma a son cetantis lis vilis de Patrie che i daran acet a cheste scuele di grafie, prudelade di «ARLeF». Dapardut lis iscrizions a son za viertis (seont lis formis sclaridîs tal lûc internet www.filologicafriulana.it o che si pues domandâ, telefonant al numar 0432 501598, int. 3). I cors a trataran cuistions di grafie, di gramatiche e di imprescj lenghistics informatics.

Peraulis in dismentie par cure di Mario Martinis

❖ SCORIE

s.f. = frusta da buoi di tipo rustico formata da una baccetta piû o meno lunga con una trecciola allacciata all'estremità
(voce dotta dal latino *scōria*, a sua volta dal greco *skōria*, con intrusione del latino *scortea* "pelle, pelliccia", da *scorteus*, a sua volta da *scortum* "pelle, cuoio" - legata a *corium* "cuoio" -, oppure dall'antico italiano *scuriada* "sferza di cuoio", dal latino tardo *excorrigiata*, da *corrigia* "correggia")
In di di vuê no coventin plui lis scoriis pai bûs.
Al giorno d'oggi non servono più le fruste per i buoi.

❖ SCOSOLÂ

v. = sbacellare i legumi, sgranare
(forma denominale di *côsul* "baccello", da cosa " con il prefisso privativo s-)
Dopo vè scosolât i fasûi, gno barbe al prepare une buine mirinde.
Dopo aver sbacellato i fagioli, mio zio prepara una buona merenda.

❖ SCOSOPÂ

v. = scartocciare le pannocchie (ma è in uso anche per indicare lo sgranamento) (d'origine onomatopeica in riferimento al suono del materiale impiegato)
Orsera o vin finît di scosopâ sul cjast.
Ieri sera abbiamo finito di scartocciare le pannocchie sul granaio.

❖ SCOTÔR

s.m. = grande calore
(dal latino parlato *ecoctare* "scottare", a sua volta dal latino *coquere* "cuocere")
Il scotôr nol fâs rime cun agricoltoir.
Calore scottante non fa rima con agricoltore.

❖ SCOVACERE

s.f. = pattumiera
(dal latino *scōpilia*, da *scōpa*)
La tô stanze e je dabon una scovacere.
La tua stanza è davvero una pattumiera.

Messe in marilenghe

A Udin, la Messe par furlan e ven cjantade ogni sabide aes 5 e mieze soresere (17.30), li de capele de «Puritât», daprûf dal domo. Sabide ai 9 di Otubar al cjanarà messe pre C. Bevilacqua. E compagnarà la celebrazion liturgjiche la corâl de Parochie di Merêt di Tombe. Radio Spazio e trasmet sul moment, ogni setemane, dute la liturgjie.